

1 Pitai

Pitai Pikarya Aaya Mudi'nanya' Yidavakesira.

1 Gotiyai yihizivwaramaaraakeihi yiwinamavesaihi,
¹Pitainyi Jizaazai Kiraazitiyai Nyidaasadeinyi Apozeliyai
pikarya daza' yihithawasiwaabe. Anga Naanga Podaazi, Galeziya,
Kapaathoziya, Eziya, Bithiniya, sangi gazabazaba angavaayaihi
mwaaihasaihirina yihithawasiwaabe. ²Kigaakuna Gotiyai Nimwai
sariminyina mena yawiraka yune gami sahwarina yihithahilakakeihilyi.
Kurya Tewaanyai Gotiyareihi nawi'nyaihiri yihimwaaihakeihilyi.
Jizaazai Kiraazitiyari midinya'na, nabaai gamire tawe' sariminyi aalya
yihya'ne'na nawi'nyaihi yima'nya'na yihithahilakakeihilyi. Sareihirine
yange'na tewaanna wigaimwangebulyi kwaamu'nanyabulyi naanna
yihimwaaihana!

Sigunyavi mwalaade'na diraginna yemwaalya'nesi.

³Nemire Naanga Jizaazai Kiraazitiyare Gotiyai Ganimaangeri
yilaaya nayaa maryaana! Neminyi kale naange'na negaimwagake'na
Kiraazitiyarina Gotiyaridaa'nyainaavi gaala mena nemwaaihakelyi.
Sahwai Jizaazai Kiraazitiyari bainikeraayawi ayina yidikaavakevi
mudikeinaavi gaala mena nemwaaihakelyi. Nabaai sahwarinevi
gaalyabwineina yima'nona “Yuyagaa' yuyagaa' mwalaade'nanyi,”
diraginna jemwaalya'neinaavi mena nemwaaihakelyi. ⁴Gamire
kaimiraayainaavi mena nemwaaihake'na Nenimaangere yuya
maraadenna diraginna yemwaaimanigo. Sarena yuna kayaaka
yinaadenna mi'. Bwia buradenna mi'. Sarena girikita'nanya
yima'nadenna mi'. Waryaanya yima'nadenna mi'. Sarena
gwarakuradenna mi'. Yarei yiwodenna mi'. Sariminyine yemwaalya
Sigunyavi Gotiyai dame daavikengira. ⁵Sarena sariminyinengi.
Gotiyare diraginyavi sariminyina dame daavikeihilyi. Sahwarina

diraginna limwabiza'na dame daavikelyi. Yinahu padaihasamaarya'nevi dimwaalyide'na dame daavikelyi. Padaihasamaata sa' yemwala yihivanike' Yirika aayagaa' ku'maayabanna yima'naabathesi. Sareburana yilaaya nayaa maryaana!

⁶Yuya sahiningina yilaaya naanga yivanigasaihilyi. Dahaa'ne' maalikagea'nesi dala pininna pininnanya taanginyanna yijiwaalyanna taanga yihizaavanigata kiri' yilaaya yivanigasaihilyi. ⁷Taanga yihizaavanigata sare'na yawita kwalaalya mipinera! Taanga sasare sabwi dara yibwaridaakuvani' "Taanga wiada kiri' Naangeri diraginna kuna limwamanigasare. Sare'na kumire limwangebwi nebulyasi." Nemi "Goliya tewaanya nevu'nadesi," yawi'daa kiri' dikevi yaamijiya'na marapiraayadivi' kwaake' nade goliya diraginya' maa'divitabaai' sarimire limwangebwi diraginyabwi yima'nade'na taanga yihivanikebulyi. Goliya kayaaka yiwode kiri' Naangeri limwangebwi goliya sahiri'bita mi'. Aawa. Sa' goliyavi wawilavaka yi tewaanya nawi'nyaangesi. Yuyagaa' waribainagwodesi. Sarimire diraginyabwi yivaimwagathe'na taanga yihivanike'nanyi. Divi Jizaazai Kiraazitiyai ku'maayaba yima'naabathehaa' Gotiyai "Limwagesaraavi yilaaya naanga wima! Byaannakeraavi wimwaaihima! Sahwaraavire yaya makilima!" kada' taanga yihivani'. ⁸Jizaazai Kiraazitiyari tinna mwanganyeta kwaihi kiri' sahwarina yihivu'nivanikelyi. Dahaa' tinna kuna mwanganyadivita kwaihi kiri' sahware limwadivisalyi. Sarevidaa'nyi yilaaya naanga nebwiina yivanigasaihilyi. Yilaaya daza' naange' tewaanaange' byaannake' warikesi. Sahiri' nemire maangeji yiniga wi'na wijiwakaade' mi'. (Aawa. Naangaangesi.) ⁹Sarimi Naangeri limwanga yunevina dara yawi'mwaasaihilyi "Aayagaa' Gotiyai nemire kuryaraavi yinahu nevadaihasamaaradelyira." Sare'na yilaaya naanga daza' yivanigasaihilyi.

¹⁰Padaihasamaata saburine' Gotiyari wi'nawijiwakyasara piropetiyara birina birina yeva yawiyawita yaasasi. Sinnawi sahware yaata sariminyine yanga wigaimwanga naangevi yihizaaya'nevina neminyina dinikesi. ¹¹Sinnawi Kiraazitiyare Kuryai piropetiyaraavi simunyangi wilaraka yibwaridaakuna, Kiraazitiyari daanga wivinya'nesi dividaa'nyi byaanna diraginyaji maarya'nesi sinnawi jalikurakyaakelyi. Sahware yawiyawita "Gathingaa' yima'nadehaakaka?" Nabaai "Beninna yima'nadengaka dazagaa'?" ¹²Sahwaraavi Gotiyai mena yibwaridaakuna "Birama'mwaata daza sariminyinenna mi'. Aawa. Dividaa'nyaraavinengira." Sara yibwaridaakuna wiada piropetiyara sa wideve dinikengi. Sa sariminyinengira. Yagaala tewaanya' Kiraazitiyai Widaasakera yihiziwaakesara daza yihithe'. Gotiyai Sigunyavidaa'nya Kurya Tewaanyari maryasaabina kya' sahware diraginyavi yagaala tewaanya' wijiwaakina yihye'. Nabaai tewaanya daza ejelijara kwaraji yawiramaasavina wivu'najarera.

Girikita'nanya maayaina nawi'nya mwalaadevwinesi.

¹³Gotiyai yuya sa yakeburidaa'nyi sarinnya simunyabwi nayaa yavada'gainapi nayaa dadivi' nayaa jemwaalyila! Jizaazai Kiraazitiyai ku'maayabanna yima'naabathevi sahwai yanga wigaimwangebwi naanga daza' yihizavaabathesi. Sarevi sarinnya simunya yunebanna yawi'divi' yuna jemwaalyila! ¹⁴“Nemi Gotiyare kaimiraayainera!” dapiji nayaa dimidinyila! Kigaa' sarimi yagaala tewaanyavina simunya kuneihiri yihivu'nake'na kayaa'nanya yesaihilyi. Dahaa' sasare sabwi ayina namidibithika! ¹⁵Aawa. Nawi'nya dimwaalyila! Gotiyai jaka mena yihizivwaramaakei sahwai nawi'nyaangelyi. Girikita'nanyai mika! Sahwai nawi'nyaangei mwaalikabaaibi' nawi'nya jide'na nawi'nyaihi jima'nyila! ¹⁶Sarevi Gotiyare bukuya' dara dinikesi. Nimi girikita'nanya maayainyi nawi'nyainyi. Sareburidaa'nyi nawi'nyaihi dimwaalyila! Sara dinike'nanyi.

¹⁷Sarimi Gotiyari widadiviki “Nimwai.” Gotiya dazai a'mwe naangeraavina tewaanyabwina marayawibwa'dei mi'. A'mwe maalikeraavina kayaa'nanyabwina marayawibwa'dei mi'. Gazaizai sara yade sabwina nayaa marayawibwa'delyi. Sarevidaa'nyi sarimi “Nimwai,” widipija' “Naangelyi. Diraginaangelyi,” yawi'divi' Sigunyavineihiki kwaaka dathavaki angavaayaihi mwaaidivisagaa' nayaa yida'na jila! ¹⁸Kigaakuna Ne sinnawinyaraavirebwi yihizaaveta waryaanyabwina yesaihilyi. Sareihiki yaasiwa'na mwaaidivi' Gotiyai yihimubaka kayaa'nanyaburi wila yihyaarakeihilyi. Sarimi mena yawi'maniga' “Kayaaka yinade nigwia piniji goliya kiniji manemubyakengi. ¹⁹Aawa. Kiraazitiyare tawesi nemubamaarakesi. Tawe daza' mubya naangesi.” A'mwera kumire kayaa'nanyabwina Gotiyarina sipizipiya diwinya yiwihwaarya saza muwarikeri tadivitabaabi' Kiraazitiyai nawi'nyaangei girika maayai neminyine'na balakelyi. ²⁰Gotiyai Kwaakeva' mwakyagaa' wawinya daza' ya'neri Kiraazitiyari sinnawi dahilakyaakelyi. Sare' kiri' aaya'ne dahasa sariminyine'na gaimwanga yihya'nei ku'maayabanna yima'naabakegaa'kira. ²¹Sahwai gamireihiri yihimwaihadaa'nyi sarimi Gotiyari limwadivisaihilyi. Gotiya sahwai Kiraazitiyari baryari yidikaavaka byaanna diragina'ni wijaavakelyi. Kiraazitiyai yihimwaihaka sarevidaa'nyi Gotiyari limwadiwi' Gotiyarina yemwaaahasalyi.

²²Sarimi yagaala nebula daza' mididivisavi sarinnya kuryaraavi girikita'nanya duimwagasi'nigasaihilyi. Sareihiki sirya'mweraavina nebulya'na yima'nya'neihi sirya'mwe pwaihiri simunya yuyangi diragina yihivu'nana! ²³Mudikeihiki mena yima'nesa'na sara jila! Dividaa'nyi kayaaka yinya'neyuraavidaa'nyi mudikeihiki mima'nye'. Aawa. Yuyagaa' yuyagaa' kayaaka minyaderidaa'nyi mudikeihiki yima'nesaihilyi.

Gotiyare yagaala yawiralimwanna yeva mudikeihi yima'nesasi. Yagaala sa' gaalyabwi kininnake' yuyagaa' waribainadesi. ²⁴Dara dinike'nanyi

“A'mwe yuyara kurivaariyara.

Kumire nigwilalaaka yuya kurivaariyangire pwasangira.

Kurivaariya sa yawaka baidengi.

Pwasa sa bwalaraawina yadengi.

²⁵ Kiri' Naangere yagaalya' baide' mi'.

Sa' yuyagaa' yuyagaa' waribainadesi.”

Yagaala sa' sara dinike'na “Yuyagaa' waribainadesi,” yawi'mwo. Yagaala daza' yihiziwaakesa' yagaala tewaanya dazasi.

2 ¹Gotiyaridaa'nyaihi mwaahasavidaa'nyi kayaa'nanya yuya sabura dimarasi'nyila! Kwaasi yagaala yuya sabulyi kwaasiya sabulyi gilyivita kwalaalyajiyaraavina simunya kayaa'na yawita sabulyi bulayagaala yuya saji sasare sa dimarasi'nyila! ²Bwaranyamilika aamunya'na mijika wiadevaabi' Naangere yagaalyavina mijika yihyana! Sarevi “Yune'na nevadaahasamaarana!” kadapiji sarinnya kuryara diraginyara yima'nipi'de'nanyi. ³Sare' dini' “ ‘Naangei negaimwadelyi,’ yawi'manigasa' waburya naange'na yihyakesi.” Sara nebulya'na yihyanneihi gamire yagaalyavina yihivu'nana!

Naangei sila gaala'ne tewaanyarinesi.

⁴Kiraazitiyaryawinna divideihilyi. Silaanga gaala gami sahwalyi. Neminyina gaalyabwi nejaavadelyi. Piri' daresi. Sahwarina a'mwera “Waryaanyalyi,” deva marasi'nesalyi. Piri' daresi. Kwarina Gotiyai “Nawi'nya nebulyalyi,” daka widahilakakelyi. ⁵Nabaai sarimi saih gamire gaalyabwi maareva silaanga gaalyai kininnakeihilyi. A'mwera siange' maja'nera silya wakadivitabaabi' Gotiyai gamireihiri yihimwaaihaka angeviyahirina gannya Kurya Tewaanyari wilayihimwaaihivanikelyi. Nabaai sarimi piriziyara Gotiyarina mubithika yira'divita tewaanyaihi gaminyina widaayadivisaihiri yihimwaaihivanikelyi. Sareih piriziyara Gotiyarina sipizipiyaraavi yiravetabaabi' sarinnya kuryara Gotiyarina duzaayideihilyi. Sara nayaa yipija' Gotiyai Jizaazai Kiraazitiyarina yawi'da yihimaaradelyi. ⁶Kiraazitiyai silaanga gaala'nerina Gotiyare bukuyavi dara dinikesi.

Yithaanyi! Saayoni Silaangeri wimwaaihivanige.

Maja'ne simijamaangei yivaimwagya'nerina widahilakiwelyi.

“Nawi'nya nebulyalyi,” dena widahilakiwelyi.

Sarevidaa'nyi sahwari diraginna limwagazai

Wagila kini maaradei mika! Arikewi.

⁷Sarevidaa'nyi Naangeri limwadivisaihirina Kiraazitiyai wana nawi'nyalyi. A'mwe malimwagi yipijaraavina dara dinikesi.

Anga madivisara silaangeri marasi'nesalyi.

Dazai Aaya Ke'banyai yima'niwakelyi.

⁸Nabaai a'mwe malimwagi yipijaraavina dara dinikesi.

Sila dazari mudaya'nelyi.

Silaangeri mudavamaaroji walaraawadelyi.

Sara dinikesi. Gotiyare yagaalya' galazekivaidaapiya'na Kiraazitiyari

muda'manigasare. Kiraazitiyari malimwagyadivi' kayaaka

yigainivanigasare. Sinnawi kigaa' Gotiyai sara dakakesi. Galazekivalyara mudapi'derera.

⁹Sare' kiri' Gotiyai mena kihithahilaka' gaminyidaa'nyaihi gamireihi

yima'nesaihi simya yisavaaki dahilakinikeihilyi. Gotiyarina mubithika

yira'divisavaakiyaihi Gotiyai Maremwaaideri widaayadivisaihilyi.

Sarimi anga naanga pimagingya tewaanyaihi girikita'nanya maayaihilyi.

Gotiyare a'mweihi, Gotiyare gilyivisaihilyi. Sareihiri yihithahilakake'na

Gotiyai yake yuya nawi'nya ya sabwi duziwaakyide'nanyi. Sahwai jaka

kihizivwara' jihinya' mena yagalya'ma'na kye' gamire baaka nawi'nyavi

wilayahimwaaihak'e'nanyi. ¹⁰Kigaa' a'mweihi mwaaletaihi mi'. Aawa.

Dahaa' Gotiyare a'mweihilyi. Kigaa' kale wigaimwangebwi maaresaihi

mi'. Aawa. Dahaa' Gotiyari sariminyina kale wigaimwanga sabwi

maakasaihilyi.

Kiraazitiyareina yadaanyaburaavinesi.

¹¹Nya'mweihi, tewaanya nyivu'nadeihi yihithihaa'bwarima! Kwaaka

davaki angavaayaihi yiwinamavesaihi mwaaihasa'na simunya ayabwi

“Wabahilaake'na kayaa'na yiwineinyi. Maa'mujainyi,” yawiresabwi

mamidibina! Sasare sabura sarimire kuryaraji mala bwa'nadivisa'nanyi.

Sarimire kuryara diraginna mwaabika! ¹²Ajimya yuyangiyaraayaba

nayaa yida'na jila! Sasarebwina sarimi yadaapiri sawara kwaasi

dinipija' “Kiraazitiyarera kayaa'na yadivisare.” Kirivi sarimire

tewaanyabwi dara yawirangabi'de' “O, sawwai nayaa yivanike' daaka!”

Gotiyai yawibwarya'nei mu'nyadivisaraayawinna boziyagaa' sarimi

“Malimwagyadivisara Gotiyarina ‘Byaannakelyi,’ dipika!” dapiji nayaa

yida'na jila!

¹³Naangerina simunya nayaa yawi'di a'mwe naangera yuyara

gimaremwaaidivisaraavi kwaakewi dimwaala! Kingiya naanga Sizaai

mwaalikerina sawhari kwaakewi dimwaala! ¹⁴Nabaai ga'maaniya

kwaraaviji kwaakewi dimwaala! Sawharaavi kingiya naangei Sizaai

maryasaabakere. A'mwe kayaa'na yadivisaraavi kayaa'nanya tivikiryane'na

kiri' nayaa yadivisaraavi yaya wimakilya'ne'naji maryasaabakere.

¹⁵Sasare gimi yadaa'giziya'na Gotiyari tewaanya wivu'nivanikelyi. Nayaa

yadaa'gi sidu'maayara yawi'divi' “Kumirebwi kayaa'nanyabwi tinna

wanganawaaji birala widaatheinera,” dara wangabi'de' “O, tewaanna

jivaniga!” Sara gimi yadi giminyinebwina kayaa'nanya yiniga wi'na

maji yipinerera. ¹⁶Nayaa dimwaala! Pwaraavi yaasiwa'wawinyaigi widaaya'neigi mamwaaidinneiginyi. Gotiyai neyaarakeinera. Diraginyaigi ginnya diraginyabwina kayaa'nanyabwi mabwakakinna! Sarevi dara myawi'dinna! “Diraginyaina mwaaaho'na kayaa'nanya yaaja' sara yaana!” Sara myawi'dinna! Aawa. Gotiyare yaasiwa'wawinyaigi dimwaala! ¹⁷A'mwe yuyaraavire yayangi munyaba dimakila! Kiraazitiyare ja'mweraavina givu'nana! Gotiyarina yawi'di “Naangelyi. Diraginaangelyi,” lika nayaa ji! Kwaaka yuyavakiya Kingiya Sizaarine yaya' munyaba dimakila!

Yaasiwa'wawinyaraavinesi.

¹⁸Angevi widaayadinyaigi ginnya maremwaiderina “A'mwe naangelyi,” nayaa yawi'di lika yadi kwaakewi nayaa dimarulawakinna! Pwara tewaanna gimaremwaaidivisaraji nayaa kave gyadivisaraji gaveraavina mi!. Aawa. Kayaa'na gimaremwaaidivita kwaraaviji nayaa dimidina! ¹⁹Sare' dare'nesi. Yaasiwa'wawinya gazaizai tewaanya yaderina daange yaasiwa'na wijavadaapi Gotiyarina simunyi tewaanyai wivadaihirakade'na sawhai murivikiryada Gotiyari kuna midinajavwina Gotiyari tewaanya wivu'nadelyi. ²⁰Sare' dare'nesi. Gimi kayaa'na yija'na asilyi mala kagiramapi murivikiri yija saburidaa'nyi Gotiyai be yilaaya gimaryadelaka! Aawa. Gimi tewaanyabwi yija' kiri' asilyi mala yaasiwa'na kagiramapi daanga maara'gizi murivikiri yija dazahiburidaa'nyi Gotiyari tewaanya wivu'nadelyi.

²¹Sare' dare'nesi. Sasare sabwi midinya'neiginyi Gotiyai jaka mena gizivwaramaarake'nanyi. Kiraazitiyai giminyina gaimwange'na daanga maaraka murivikiryai. “Nimi sara yebaaibi' nimore sivila yibwarimakupika!” daka givwaridaakwa!. ²²Sahwai kayaa'nanyabwi yakai mi!. Gamire maangiki kwaasi yagaala wi'netai mi!. ²³Sahwari biraiyagaalyaji widina kye' biraiyagaala ayina mujakelyi. Sari daanga wivinaka kiri' maiyagaala mujakelyi. Aawa. Gotiyai yuyangine yidasava'na yawibwa'dei sawharaavi wirivikiryane'na Gotiyare asiri wimwanganakelyi. ²⁴Gami sai gannya kilaakejiki nimore kayaa'nanya maaraka yisavi timunadaavakelyi. Neminyina “Sahwara kayaa'nanyanna balapiji yida'maraangebwinagaala mwaaibika!” daka balakelyi. Gamire kilaakejiki ga'bwaralyaji kayaaka kigale' daanga maarakelyi. Sasara gaminyi yima'nake'na ayina tewaanya yavada'gala gyakelyi. ²⁵Sare' dare'nesi. Kigaa' sipizipiyara tusa' yagalya'mavesarabisaigi tewaanya mamwaalyagi. Aawa. Kiraazitiyai ayina mena kagimakaba' dahaa' gimire kuryari maremwaalyai sipizipiyaraavi maremwaaideryaba tewaanya mwaalagi.

A'mweyuraavinesi.

3 ¹Sasarebaaibi' kwala maa'nike'gi ginnya a'mweri kwaakewi dula'naka! Sarevidaa'nyi kwalaangei Kiraazitiyare yagaalya'

galazekivaina yajai kwai gimire nawi'nyaburi gwanganaji Naangerei yima'nannelyi. Yagaala duthathe'na mi'. ²Gimi “Ninnya a'mwei naangelyi,” da'gizi nayaa wimididinya'gireburi tinna gwanganade'nanyi. ³“Ninnya a'mwei nawi'nya'nyi nyawiranganana!” da'gi gimire kilaakejiki mwasimaginna yiwaala miwanninnera! Mijasangi yiwaala yiwannadinyaji nigwilalaaka paidapaide yi'deji baazi'ma'nya dala nabinabinyaji miwanninnera! ⁴Aawa. Kusimaginna ginnya simunya lika yulyarikevi yiwaala yiwanninne'ginyi. Yiwaala daza kayaaka yinadenna mi'. Yiwaala sa darebulyi. Kuryara kwaamu'nanyara kave mwaaidivisabulyi. Kwaamu'na yadivi' nayaa dadivisabulyi. Sasare sabwi Gotiyai tinna wangada “Wana nawi'nyaangebulyi,” dadevulyi. ⁵Sare' dare'nesi. Kigaakuna a'mwe Gotiyari yemwaaidivi' nawi'nya mwaaleva sabwi sara yaasangira. A'mwe daza yiwaala sasare sabwi kave mwaalya'nebwi maa'divi' kunnya a'mweraavi kwaakewi nayaa wila'naryaasangira. ⁶Seraa' sasare sabwi yaakesi. Eviraamimire yagaalya' midinna yaka sahwarina “A'mwe naangeigi,” widakesi. Nabaai gimi nawi'nyabwina sara yija' aane piri' kirivina lika yarai mi jitheviridaa'nyi Seraa' nawi'nyabwi yaakebwi ya'gizi Seraavire kaimiraaya'gi jima'nade'ginyi.

⁷Sasarebaaibi' kwala maakinyaigi simunya nawi'nya yawi'di ginnya a'mwesi nayaa dimwaala! Dara yawi'na “A'mwevire kilaakeji' diraginyaji' mika! Sarevidaa'nyi nayaa yideinyi.” Nabaai dare'na yawi'di “Gaalayaburine Gotiyare yanga wigaimwangevi a'mwesi yuna maarakade'naalyi. Sarevidaa'nyi ninnya a'mwevire yaya' makilima!” Sara jawika! Sara mi yija'na Gotiyari kuda'gizi magu'nyi nagyathika!

Kiraazitiyarera nayaa yipinesi.

⁸Dahaa' yagaala da' dara ji'mwannide'nanyi “Sarimi yuyaihi avaaizimunya jila! Pwai pwarina pwai pwarina yawi'divi' dimwaalyila! Kiraazitiyare sirya'mweraavina yihivu'nana! Kale yihyana! Pwaraavire yaya mamakwalaawi yapiji sarinnya yaya mamakilaapina!” ⁹Nabaai a'mwera kayaa'na kihyapiji kumire sabwina murivikipinera! Nabaai biraiyagaala kihithapiji biraiyagaala sanna murivikipinera! Aawa. Kumire yadivita sabwi darebwi dirivikiryideihilyi “Gotiyai tewaanya nejaavade'na Gotiyari widaana! ‘Sahwaraavina tewaanya duzaama!’” Sasare sabwi kyapiji Gotiyai “Nimirera yima'napiji tewaanya naanga maapika!” daka jaka yihizivwaramaara'. ¹⁰Sare' dare'nesi. Dara dinikesi.

A'mwei dara yawiraja'

“Mwaalyabwina tewaanya nyivu'nana!

Yirika tewaanyangi wanganima!”

Yagaala kayaa'nanya bipalana!

Kwaasi yagaala madanna!

- 11 Kayaa'nanya' ginyira'na yana!
Tewaanyavi nayaa yana!
Munya yirila diwannana!
Sasarebwi diraginna midinana!
- 12 Naangei yida'maraangeraavi wangamanike'nanyi.
Tinna wanganaka maremwaidelyi.
Naangei yidaanganya wi'nivanike'nanyi.
Kadika wi'naka wigaimwadelyi.
Kiri' kayaa'na yadaapiyaraavi
Jikuritinna diraginna yivanike'nanyi.

Sara dinike'nanyi.

13 Nabaai sarimi diraginna nayaa yipija' tewaanya sabwi midinya'na kayaa'na yihya'nei bewalaka! 14 Aawa. Kiri' yida'maraangebawina yipija' sahirivine'na Gotiyarina taangesi daangesi damaa'maniga! Sare'na yilaaya yadivi' tewaanaanga yihyinannehilyi. Nabaai lika ya'ne pini kihiziwaalapiji sahininna sarimi lika mipinera! Yawita kwalaalya mipinera! 15 Sarinnya simunyangi Kiraazitiyarina jawiranganyila! "Nemire Naangelyi. Tewaanyalyi!" Nabaai gazagaasagaa' ayina wija'na diraginna dimwaalyila! Gazaizai kihithaanganoji "Sarimi yemwaaimanigata saburi aaya kaavilya' berivaka?" Sarevi ayina wija'na nayaa jemwaalyila! Kiri' nayaa ja'nawidadivi' kwaamu'nanyaihi yagaala kaveyaji jideihilyi. 16 Sarimire simunyai tewaanyai padaihirakya' nayaa yida'na warana! Sarevidaa'nyi biraiyagaala yihithipijahaa' kayaa'nanya daza' divanigasara dara wangabi'de! "O, Kiraazitiyari mididivisara tewaanyabwi jivanigava!" Nabaai "Sahwara kunnya yagaalya'na wagila maapika!" dapi kave duzideihilyi. 17 Sare' dare'nesi. Gotiyai simunya yawiraja' "Tewaanna yadaapi nimireraavi taanga wiana!" sarimi tewaanyabwi yadivisa'na taanga wia sa' tewaanyasi. Kiri' sarimi taangebwi maapija' kayaa'na yipija' sabwina sa' wana kayaa'nanyasi. 18 Kiraazitiyai tewaanna yada taanga wina yesa'na sarimi avaaina yipineihilyi. Yi yune gave pigaa'na sarimire kayaa'nanyanna Kiraazitiyai balake'nanyi. Sahwai a'mwe yida'maraangei sarimi a'mwe kayaa'nanyaihirineba bala! "Gotiyaryawinna sahwarraavi makuma!" daka balakelyi. Piri' daresi. Sahwai kilaakevi a'mwei mwaaidi'nyi tamarimwesalyi. Piri' daresi. Kuryari ayina yidikaavaka gaalyai mwaalikelyi. 19 Nabaai kuryari kuryara kalavuzangevi mwaaidapiyaraavi widaawakelyi. 20 Kigaakuna Nowaaregae' Gotiyare yagaalya' galazekivaina yaasaraavi widaawakerera. Sahiri'na nabaai Gotiyai yarai murivikiryaka sahwarraavi yemwaaina ya'. Sagaa' Nowaai sipiya' yavikarina kya' kwala maalikera nayaa wilamwaaina yina ye'. Sipiya savi kusawi a'mwe ata puridaa'nyi daraai dalyara aalyavi yivainyaakere. 21 Daza' bavitaaziya'na ke'ba'nanya' yakesi. Sariminyi bavitaaziya'

yihyada kayaa'nanyabwi marasi'nada yihivadaihasamaarakesi. Jizaazai Kiraazitiyai ayina mena dikaavakevidaa'nyi yihivadaihasamaarake'nanyi. Mudikeihi mwaaihasaihilyi. Bavitaaziya' kilaakejiki girika marasita'ne' mi'. Aawa. Bavitaaziyagaa' Gotiyai sarimire yidaanganya wi'naka sariminyine simunyara tewaanyara padaihirakya'neihiri tewaanyaihiri yihimwaaihakesi. ²²Kiraazitiyai dikaavakei Sigunyavina mena yilaawaka diraginyaba Gotiyare aangasiri yilamwalaawi'. Ejelijaraji naanga nabinabinyaraji diraginnakeraji yuyara sahware kwaakewi wila'narya'neliyi.

Kiraazitiyareraavine taangebwinaji widaaya'nebwinajiya'nesi.

4 ¹Kiraazitiyai gamire kilaakejiki daanga maarakelyi. Sarevidaa'nyi sahwai simunyabwi limwagakabaabi' nabaai sarimi avaaizimunyabwi diraginna nayaa dilimwagyila! Yi dare'na “Tewaanyabwina pwara a'mwere kilaakejiki daanga wijaadivisa'na sahwai kayaa'nanyabwi ayina yadei mi'.” ²Sarevi dazagaa' sahwai kilaakejikina kuna mwaaidhaa' dika widade kayaa'nanya sangi ayina midinadei mi'. Aawa. Sai Gotiyare simunyaburi mwaaladelyi. ³Sare' dare'nesi. A'mwe ajimya yuyangiyara Naangeri malimwagyadivita saraavire “Kuna yaana!” dadivi' yadivi' yadivita saburi kigaa' sarimi yaata sa menanyira. Dahaa' ayawi mipina! Sahwara da'dare sabwi darebwina mwaaidivisare. A'mweraavi a'mwengi ata limwadivi' girikita'nanyabwi yadivisare. Dika widadere. Biyaaya nadivi' yimakaanya yamarina yadivisare. Tika munne naangengi saaminayagaa' mwalibainyina yadivi' biyaaya diraginya kwalaalya nadivi' kayaa'nanyabwi yadivisare. Kwaasi gotiyaraavina yilaaya yadivi' kayaa'nanyabwi yaasiwa'na yadivisare. ⁴Dahaa' sarimi sasare kayaa'nanya sabulyi yaasiwakebuluyi sabwina sahwaraaji mye'mwannayivaniga'. Sarevidaa'nyi “Be'neka!” dadivi' lika yiwaainadivi' biraiyagaala yihithivaniga'. ⁵Sahwara kumire yadivita aaya kaavila sa'na yawibwarya'neri yagaala widipi'delyi. Sai yawibwasa'na mena yemwaalikelyi. Sai a'mwe mwaaihata kwaraaviji barya kwaraaviji yawibwaradelyi. ⁶Sare' dare'nesi. Sarevi sinnawi yagaala tewaanya' a'mwe mena bainika kwaraaviji mena wijiwaakesasi. Gotiyai maryawibwasa' mena dinikesi. Kilaakeji' baloji kwaakevinejiki. Piri' daresi. “Yagaala tewaanya' wi'neta sahwaraavire kilaakejikana maryawibwarima!” kada' wijiwaakina. Piri' daresi. “Gotiyainyi kuna mwaaihebaabi' kumire kuryarana gaalya'nera mwaabika!” kada' wijiwaakina ye'.

⁷Yuya yiwawodehaa' aya kigaa' menanyira. Sarevidaa'nyi simunya nayaa jawirila! Sarimi nayaa pada'galayawi'na yadivisa'na yuyagaa' Naangeri nayaa duzideihilyi. ⁸Yuyangi sinnawinya' da'daresi. Sirya'mweraavina

yihivu'nana! Sabwi diraginna dilimwagarila! Kihivu'noji pwaraavire kayaa'nanya kwalaalya sariminyine dimarasi'nyideihilyi. ⁹Sarimiji bye'mwannamwaaibineraavi sirya'mweraavi sarinnya angengi nayaa dimaremwaalyila! Sara yapiji maajimunya myawipina! ¹⁰Sarimijiya gazaigizaigi Gotiyare yangebwi maaragineigi pwaina pwainanyari dihaimwana! Gaimwanga sasare wawinya yadinya nawi'nyaigiji Gotiyare yanga pininna pininnanya wijaapalya'na sara jinyila! ¹¹Gotiyai yangenna diraginyanna yihizaavake'na dara jila! Yi sarimijiya pwai yagaalya' wijiwaakajai nabaai yange'na sai Gotiyare yagaalya wijiwaakana! Pwai a'mwe pwari widaayajai yange'na Gotiyai wijaavade diraginya sasi sara yana! Sana sana jila! Sarevidaa'nyi a'mwera yuya wawinya sa tinna wanganapiji “Jizaazai Kiraazitiyarina a'mwera ‘Gotiyai byaannakelyi,’ dipika!” dapiji sana sana jila! Sahwai byaannyasi yilaaya naangesi kininnakei yaka diraginaangei yuyagaa' yuyagaa'nelyi. Nebulyasi.

¹²Nyivu'nadeihi, sarimire limwangebwi yaamiji ya'ne'na dike' a'mweraavi nadevaabi' taanga kihyoji lika nyiwaainipika! Sanna dara nyawipidi! “Dala nabinya neyima'nivanika!” ¹³Aawa. Daanga dazavina “Kiraazitiyari daanga wivinakabaabi' nevimanike'nanyi,” dapiji yilaaya jila! “Divi gaminne byaanna diraginya' ku'maayaba yima'naabathevi yi yilaaya naanga kuna yadaa munyi' nayaa gaimakunna yaana!” dapi daangenna yilaaya jila! ¹⁴Kiraazitiyarina biraiyagaala yipija'na yilaaya yadivi' tewaanaanga yihyinannehilyi. Gotiyare Kuryai byaanna diraginya' kininnakei yihimwaalike'na yilaaya jila! ¹⁵Sare' dare'nesi. Sarimijiyari daanga wivinajai a'mweri tamakya'nei namwaaladika! Yi kuka maarya'nei, yi kayaa'nanya ya'nei, yi pwaraavire yaasiwa'na maremwaalya'nei, yi dazareri daanga wijaavipi'devaabi' tivikisa'na sarimijiyari daanga nujaavipika! ¹⁶Pwai tewaanyabwi yadei Kiraazitiyare mwaalike'na taanga wijaavipija' wagila maaarannera! Yaya nawi'nya sa' Kiraazitiyarerine'na Gotiyarina “Byaannakelyi,” dana! ¹⁷Gotiyai yawibwarya'negaa' yarai yima'nadehaaki. Gotiyai gannya angeviyainaavidaa'nyi neyawibwaradelyi. Sinnawi diraginna sara kaneyoji Gotiyare yagaala tewaanya' galazekivaidivisaraavi gatha'dara yannevaka! Maalike' mi'! ¹⁸Dara dinike'nanyi

“A'mwe yida'maraangeri taanga naanga kujaavapiji
Kiri' Gotiyai gamire kayaa'nanyabwi padaihasamaaraja'
Gotiyari ginyira'derina gatha'darevaka!
Kayaa'nanyari gatha'dara ya'nelaka!

Kayaa'nanyaraavi yiniga wi'na mavadaihasamaari yaderera.”

¹⁹Sarevidaa'nyi Gotiyai simunya yawiranne daange maa'manigatabaabi' Kiraazitiyarera nayaa yida'na yadivi' kunnya kuryaraavi Gotiyarina wijaavinipika! Sahwai newakyaakelyi. Yuyagaa' gannya yagaala widadengina sara yadelyi.

Gotiyare kusilaanyabwinesi.

5 ¹Yuya sarengidaa'nyi sarimijiya a'mwe naangeraavi widihaa'bwarima! Nimi kwainyiji Naangereraavire naangeinyi mwaaiheinyi. Nabaai Kiraazitiyai daange kamaara' nimi sainyi tinnyaraalyi wanganerina jalikurakadinyainyi. Naangere byaanna diraginya daza' ku'maayaba yima'naabathe' nimi kwainyiji kwaihilyi maraadeine. Sareinyi naangeihiri diraginna yihithima! ²Sipizipiyaraavi maremwaaidivitabaabi! Gotiyare a'mweraavi sariminyabanneraavi nayaa dimaremwaalyila! Wawinya yivanigasangina a'mwera diraginna yihyadivi' saihi yaasiwa'na nyipidika! Aawa. Gotiyai simunyavi “Sahwara nimireraavi maremwaabika!” yawi'devaabi' nayaa jila! Yune nigwianna maarya'nenna wawinya sa' mipinera! Aawa. Sarimire simunyangi “Nayaa wigaimwagima!” dadivi' diraginna nebwinna jila! ³Gotiyai a'mweraavineihiri yihithahilakaka saraavi dathiwanga mipinera! Aawa. Gotiyarera sarimire mwaalyaburiji ya'neburiji tinna yihwanganapiji tewaanyabwina yibwaridaakwia'na sara midibi'de'na tewaanyaihi dimwaalyila! Sareihi dimaremwaalyila! ⁴Sare' sipizipiyaraavina Maremwaala Aaya Naangei ku'maayaba yima'naabathehaa' yihirivikirya'ne' byaanna diraginya' miwiyi yade' dimaaryideihilyi.

⁵Sabaabi' a'mwe miginya kwaihi a'mwe naangeraavi nayaa dimidinyila! Sara yadivi' sarimi yuyaihi nayaa kwaamu' mwaalyabwi maa'divi' sirya'mweraavi nayaa duthaayila! Dara dinike'nanyi “Gotiyai pihadika yipijaraavi tihiradelyi.

Kiri' kwaamusaraavina yangebwi wijaavadelyi.”

Sara dinike'nanyi. ⁶Sarevidaa'nyi yune gannyagaa' Gotiyai “Kumire yaya' munyaba makilima!” kadozi gamire ata diraginaangiri kwaamu' dimwaalyila! ⁷Sahwai sariminyina yawi'da nayaa yihimaremwaaide'na yuya yawita kwalaalya gamire asiri dakyila!

⁸Nayaa divada'galayawirila! Tinna nayaa jemwaalyila! Sarimire yikamaangei Kotiya Maryadei, kavijilika pwai laayonyai pwaka diraginna dadevaabisalyi. Sai kaanya yamaryada a'mwe pwaraavi tika nya'neraavina biragaaziwadelyi. ⁹Naangeri diraginna limwangevi diraginna mwaalapiji sahware dirivikirasi'nyidelyi. Sarimi yawi'maniga' “Nemi daanga ma'daanyabaabi' neya'mwe yuyara Kiraazitiyarera Kwaaka yuyavaki mwaaihasara daanga maa'divisare.” Sare'na diraginna dithaayila! ¹⁰Gotiyai yuya yanga gaimwangeburi aaya kaavilyalyi. Kiraazitiyarina jaka yihizivwaramaaraka sahware byaanna diraginya' yuyagaa' Kiraazitiyari waribainade' yihizaavakelyi. Daange' maalikegaa'na dimaaryide', divi gami sai yavada'galayihimwaaihatelyi. Yihimaridaakwadelyi. Sarimire simunyangi diraginya yihivaimwagathelyi. Diraginyaihiri yihimwaaihatelyi. ¹¹Sahwai diraginya' kininnakei yuyagaa'ne yuyagaa' nemaremwaalana! Nebulyasi.

Yagaala pininnesi.

¹² Saailaazare asiri yagaala tuta damili' yihidawasiwaabe. Nimi sarina yawi'na “Neya'mwei nawi'nyalyi.” Pikarya dazavi “Sariminyi dihaa'bwarima!” dena mena yawirangadi yihizalikurakivanige. Daza' Gotiyare yanga gaimwanga naanga nebulyasira. Dazavi nayaa diraginna dithaayila!

¹³ Naangerera Babiloni mwaaihasaraaviji mena yihithahilakakera “Neya'mweihi!” yihithiwaa'. Nabaai nimirei Maakiyai sai kwalyi “Nya'mweihi!” yihithiwa'. ¹⁴ Sarimi yuyaihi sirya'mweraavina kale ya saburine maangwidaayilaaya dimarinyila!

Kiraazitiyari wilamwaaihasaihi tewaanyaihi dimwaalyila! Gotiyare naryavi dimwaalyila! Sare' nyivu'nivanikesi.

Pitai